

Meeqqat atuarfianni angajullit atuartinneqarnerini MMS imaluunniit nittartakkakut naapittarfikkut tamataqanngitsunik assinik avitseqatigiittarnermut tunngasunik paasissutissiisarneq eqqunneqarnissaannut Naalakkersuisut peqquneqarnissaannut aalajangiiffigisassatut siunnersuut.

(Demokraatit Inatsisartuniitsitaat)

Akissuteqaat

(Ilinniartitaanermut, Kultureqarnermut Ilisimatusarnermut Ilageeqarnermullu Naalakkersuisoq)

2. Aappassaaneerera

Naalakkersuisut aammaarlutik Demokraatit inatsisartuniitsitaat qutsaviginiarpaat internetimi oqarasuaatinilu angallattakkani tusagassiorfiit assigiinngitsut aqqutigalugit tamataqanngitsunik avitseqatigiittarnerup ajornartorsiutaanerani immikkut iliuuseqarniarsarilermata.

Naalakkersuisuttaaq Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaani peqqissaarussilluni suliaqartoqarsimammat qujassutiginiarpaat. Ataatsimiititaliap oqaaseqaataanut aamma ataatsimiititaliap tamarmiusup aalajangiiffigisassatut siunnersuummik tapersersuinerat Naalakkersuisut paasereerpaat. Ilanngullugulu aalajangiiffigisassatut siunnersuummi ataatsimiititaliamit ilanngunneqarpoq MMS aamma/imaluunniit inuit qarasaasiakkut naapittarfii aqqutigalugit tamataqanngitsunik avitseqatigiittarnerup ulorianartoqarnera meeqqat atuarfianni angajullerni ilinniartitsissutini aalajangersimasumik ilinniartitsissutigineqartalissasoq. Tamatumalu kingunerisaanik ataatsimiititaliami ilaasortat tamarmik isumaqataaffigisaannik allannguutissatut siunnersuummik Inatsisartunit akuersissutigineqartussamik ataatsimiititaliaq saqqummiivoq:

Meeqqat atuarfianni angajullit atuartinneqarnerini MMS imaluunniit nittartakkakut naapittarfikkut tamataqanngitsunik assinik avitseqatigiittarnermut tunngasunik paasissutissiisarneq eqqunneqarnissaannut Naalakkersuisut peqquneqarnissaannut aalajangiiffigisassatut siunnersuut.

2016-imi ukiaagaa Ilinniartitaanermut Aqutsisoqarfik aamma Digitalimik Ingerlatsinermit Aqutsisoqarfik suleqatigiissitamik pilersitsipput, taakkulu meeqqat atuarfianni qarasaasiakkut periusissamut innersuussuteqartussaapput. Suleqatigiissitaq apriliimi 2017-imi periusissamik saqqummiivoq. Periusissami ilaatigut sammisaq "Digitaliusumik pinngortitsisarneq" sammineqarpoq, tassanilu pineqarpoq ilinniartut tusagassiorfinnik digitaliusunik isumannaatsumik tulluurtumillu atuisinnaalernissaat.

Kiisalu Naalakkersuisut erseqqissaatigissavaat Inatsisartut 2017-imi Ukiakkut Ataatsimiinneranni meeqqat atuarfiat pillugu inatsimmik misissuisoqarnissaa pillugu

Naalakkersuisut saqqummiinissamik pilersaarmata. Tassunga atatillugu pilersaarutaavoq Atuarfimmi atuartitsissutini atuartitsissutinilu qanitariissuni alloriarfiit siunertaat kiisalu atuartitsissutit siunertaat ilikkagassatullu anguniagassat pillugit nalunaarut ilinniartitsinermut atatillugu anguniagassanik nutaanik immerlugu misissoqqinneqassasoq, tamatumanilu aalajangiiffigisassasut siunnersuummi matumani anguniarneqartussat ilanngunneqassallutik. Taamaammat Naalakkersuisunit erseqqissarneqassaaq tamataqanngitsunik assilineqartut aamma tamataqanngitsunik videoliat avinnerisigut ulorianartoqarsinnaanera pillugu ilikkagassatut anguniagassat nutaat meeqqat atuarfiat pillugu inatsimmi immini ilanngunneqarnaviannngimmata. Iikkagassatulli anguniagassat nutaat Atuarfimmi atuartitsissutini atuartitsissutinilu qanitariissuni alloriarfiit siunertaat kiisalu atuartitsissutit siunertaat ilikkagassatullu anguniagassat pillugit nalunaarummi nutaami ilanngunneqarumaarput, taakkulu meeqqat atuarfiat pillugu inatsimmi tunngavilerneqarlutik atortussanngortinneqassapput.

Naalakkersuisut Inatsisartunut inassutigissavaat ataatsimiititaliap allannguutissatut siunnersuutaat akuerineqassasoq.